

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
KANTONALNO TUŽILAŠTVO
ZENIČKO-DOBOJSKOG KANTONA**

**Broj: T04 0 KT 0055590 23
Zenica, 20.05.2025. godine**

**OPĆINSKOM SUDU U TEŠNJU
-Sudiji za prethodno saslušanje-
TEŠANJ**

Na osnovu člana 45. stav 2. tačke i) u vezi sa članom 241. stav 1. Zakona o krivičnom postupku Federacije Bosne i Hercegovine ("Službene novine Federacije Bosne i Hercegovine", broj: 35/03, 37/03 ... 74/20, u daljem tekstu "ZKP F BiH"), podižem:

O P T U Ž N I C U

Protiv:

A. J., neosuđivana,

što je:

dana 23.10.2023. godine, oko 23,07 sati, u Tešnju, upravljajući putničkim motornim vozilom marke „...“, tip „...“, registarskih oznaka „...“, krećući se iz pravca T. u pravcu Tešnja, vozila neoprezno i nedovoljno pažljivo, jer nije obratila pažnju na pješake koji se nalaze na kolovozu ili stupaju na kolovoz svjesna da tako vozeći može ugroziti javni promet i dovesti u opasnost živote ljudi i imovinu, ali je olako držala da zabranjena posljedica neće nastupiti ili da će je moći spriječiti, pa je postupajući suprotno odredbama člana 28. stav 1. Zakona o osnovima bezbjednosti saobraćaja na putevima u Bosni i Hercegovini ("Službeni glasnik Bosne i Hercegovine", brojevi: 6/2006, ..., 88/2023), vozeći tako, po dolasku u mjesto B. u ulicu ..., u neposrednoj blizini autobuskog stajališta, na desnoj saobraćajnoj traci prednjim desnim dijelom svog vozila udarila u pješaka H. I. koji je prelazio kolovoz sa lijeve na desnu stranu, ugrozivši time sigurnost javnog prometa, uslijed kojeg udara je H. I. zadobio teške tjelesne povrede u vidu nagnječenja i krvnog podljeva u području lijeve strane čela, preloma nosnih kostiju i nosne pregrade sa pomakom ulomaka, nagnječnorazderne rane na nosu i iščašenja palca u prvom zglobu između prve kosti doručja i prvog članka palca koje povrede u svom sveukupnom djelovanju na život i zdravlje H. I. predstavljaju teške tjelesne povrede,

dakle, kao učesnik u saobraćaju na putevima koji se ne pridržava saobraćajnih propisa, time tako ugrozila javni saobraćaj, da je dovela u opasnost živote ljudi, pa je zbog toga prouzrokovala teške tjelesne ozljede jedne osobe,

čime je počinila krivično djelo Teška krivična djela protiv sigurnosti javnog prometa iz člana 336. stav 3. u vezi sa članom 332. stav 3. u vezi sa stavom 1. Krivičnog zakona Federacije Bosne i Hercegovine ("Službene novine Federacije Bosne i Hercegovine", broj: 36/2003, 21/2004, ... , 31/2023, u daljem tekstu "KZ F BiH").